

# Ngwuja'ri ngwanni ngwullu je Bulij Täjlänüki gi'ra rom Äni kitabanu

Bulij gwullu ngwuja'ri ngwee ngwuru gi'ra rom, ngwuje ülliji ngwikirijinä ngwudi gi'doonga gidi Ngwaalu kündär gani Täjlänüki aar gwuji ngwuja'ralu ngwanni ngwüllijing je gwerre. Bulij gwügwällinä ngwikirijin ngwe gwani ndi mätinälü gwegen 'di'däny ndi änni Ngwaalu a gwani ämnäjidi gwegen gwüpäng, na gwani ji gwegen aar je übinälü gwulleney.

Bulij gwinggida ngwuja'ranu ngwee ngwul-lung je, ndi ari gwerre gwerre ndi Kirictu o'ra, ke gwadi ji gwonyadu gididlä, a ngwüji ngwa gwuji yelenya yidi nginde gwanni gwucaar “gwindälü mbüny.”

Bulij gwor'temaja ngwikirijinä ndi mätinälü 'di'däny ndi änni Ngwaalu gwegen. Ngwu-girinya ngwami'ri. Ngwuje ondaci ndi ari aar ape yiiru aar eny ngwuy ngwe ngwegen, anaku apaar gu yiiru, nginde gwani Bulij na ngwoo'ra ngwükäjäär je ngwu'ter anni jaar Täjlänüki.

## **Yajang yidi ngwuja'ri**

1. Aganni (1.1-2)
2. Ortada na gwällini (1.3-12)
3. Enggaci gwani o'ra gwudi Kirictu (2.1-17)
4. Ola gwani eelle gwudi ngwikirijin (3.1-15)
5. Mi'rä (3.16-18)

<sup>1</sup> Ngwuja'ri ngwee ngwändi 'dänggäri Bulij na Jiliwanij na Timijawuj. Ngwükäci nje gi'donga gidi Täjlänüking gidi Ngwaalu ngwuru Papa gwege na Deleny dani Yicu Kirictu.

<sup>2</sup> Ara je gu yimi'rü na adatalu gwudi Ngwaalu ngwuru Papa gwege na Deleny dani Yicu Kirictu ji.

### *Yäy 'tu na otaci Ngwaalingalu*

<sup>3</sup> Yädi gu giyomon 'dar ndi nyii ci Ngwaalinga yäy 'tu gwani nga nga liru ngweengga aar gu ele kayalu no, ndi ari änni Ngwaalu gwalu nggwo gwuma 'tälü na ännäjidi gwalu nggwo ndi gendadi.

<sup>4</sup> Yäy gu no nyii gilo lirिंगinä je le giyi'doonganu yidi Ngwaalu gwani or'temaji na änni Ngwaalu gwalu na übinälü na dirbä danni ndo dor'temaja gu.

<sup>5</sup> 'Dar giyee yinggida ndi ari obalu gwudi Ngwaalu gwäti ngwäyanü, yäy gu no la je i'ra lädi giyelenyanu yidi Ngwaalu, yanni giyo yiyjä je dirbä.

<sup>6</sup> Ngwaalu ngwüdünälü ling je reraji lanni licä je dirbä

<sup>7</sup> gwa je gataji düwä lanni gilo gidirbänü a gwunje gataji düwä 'to. Ya ji giyee ma Deleny dani Yicu 'tädlü kerala yi'rr ye yüngün yiru yiima,

<sup>8</sup> ligä le lu'du, ndi obalu ngwüji ngwe ngwanni ngwa'ti lingidi Ngwaalinga aar 'ti 'dengenaja ngwuja'ri ngwanni ngwujaw gwudi Deleny dege dani Yicu.

<sup>9</sup> La aar le obalu la geradalu geradingalu gwudi gwur'taling la aar je längitäji poor ngwäyänü ngwudi Deleny na ndi näji gwudi yiima yüngün

<sup>10</sup> gomon nggä'di gading ge o'ra ndi näjini ngwüji ngwe ngwüngün ngwanni ngwuju'ru a ngwüji ortada ngwanni ngwuma ämnä 'dünggüngün. Ngaa gilo ganu, ndi ari ngaa lämnä ngwuja'ri ngwanni ngwondacara je.

<sup>11</sup> Yäy gu no yi'ral ye giyee ki'ranu, nyii lati otaci Ngwaalingalu yomon reny gwani nga nga ndi ari ara je Ngwaalu ngwege gäbici ngaa aw ndi urnidi gwanni gwornacara je. Nyii otaci Ngwaalingalu ndi ari ara je Ngwaalu gataji düwä yiima ye yüngün ngaa medaji yi'ral 'dar yanni yijaw yanni yibupa je ndi ärrä, na apepe gwanni gwati ila ämnä gwe Ngwaalu gwalu.

<sup>12</sup> Nyii lotaca Ngwaalingalu yi'ral ye giyee nunnu a ngwüriny gwudi Deleny dege dani Yicu näjini 'danggalanu ngaa näjini 'dünggüngün, gwani yimi'rü yidi Ngwaalu ngwege na gwani Deleny dani Yicu Kirictu.

## 2

### *Gwanni gwändälü mbüny*

<sup>1</sup> Ma ji ma Deleny dege dani Yicu Kirictu o'ra, a la o'radalu ndi ar le mbudi. Lani ngweengga, nggwa je päcälü ndi ari,

<sup>2</sup> aa'ti yigor ya je pänü ara je yedeny eny gwani yijir, na ngwuja'ri ngwaru ngwe ngwüji nyii laadi ru lükäjä je. Ngwondajaar ngwe ndi ari gomon gidi Deleny gima ila.

<sup>3</sup> Aa'ti dijü dere da je dudiyi gay ge gere, lüngidär ndi ari gomon nggä'di, ga 'ti gila 'di a ngwüjü ngwonyadu nyurtanu gwerre gwerre na nginde gwanni gwändälü mbüny 'täädälü, gwanni gwani geradalu.

<sup>4</sup> Gwa übinä yi'ralalu 'dar gwa alliji ligo'rala lüngün giyi'ralala pipi'ri'ti yidi Ngwaalu na yanni yäpjjäär je yobo nunnu ngwalliji ligo'ro lüngün ngwujalu kobo gidi Ngwaalu ngwari diru Ngwaalu.

<sup>5</sup> Ngaa la'ti diwayina gaji ganni gijar ge ndi ari äny gwata je ondaci yi'ral ye giyee?

<sup>6</sup> Na gwenene ngaa lilüngidi yiru ange yanni giyo yimätädälü nunnu ngwa ji ngwü'tädälü kaji ganni gïg'i'tjjäär.

<sup>7</sup> Ndi ari yiima yidi yujimidi yidi dijü ndee giyo yima ji giyiiru, a be nginde gwanni nggwo gwümätädälü, gwading määätädälü gwur'tal nunnu 'di aar äbrï ngindeng kayanu.

<sup>8</sup> Gwa aar be gäbïcälü nggwo gwändälü mbüny gwa 'täädälü gwanni gwadi Deleny dani Yicu dami büdä gwe gwudi düwä didi ngwulem ngwüngün ngwududiyi näji gwe gwudi buri gwüngün gwadi nggwe ila.

<sup>9</sup> Ila gwudi nginde gwanni gwändälü mbüny, gwadi ila yiima ye yidi dijego'rr ndi inggidi yi'ral 'dar yanni yiru yi'duru yidi yiima, yi'remna na allalu ndir,

<sup>10</sup> na 'dar yanni yiki yanni yadi dudiyi ngwüjü ngwanni ngwani yi'rany. Ngwani yi'rany nunnu ngwu'donya ndi ämnä yi'ral yanni yäti ngwäyänü nunnu aar gïlängidini.

<sup>11</sup> Yiru giyee yigäbici Ngwaalinga ngwügäbici yiima yidi dudi aar ape yiiru nunnu aar je ämni yanni yiru 'tur

<sup>12</sup> a nunnu ngindenga 'dar aar je le obalu lanni lima 'ti ämnä giyi'ral yanni yäti ngwäyänü, a je be yi'ral jadanu yanni yiki.

### *Mätinälü gwudi ngwikirijin*

<sup>13</sup> A be nyii lati ci Ngwaalinga yäy 'tu yomon reny gwani nga nga lani ngweengga ngwämnä je Ngwaalu, ndi ari 'tu'tu gwele gwerre Ngwaalu ngwäbrä je nunnu ngaa gilängidini ju'riyi gwe gwudi yiiru yidi Ligi'rim na ämni gwe giyi'ral yanni yiru 'didanu.

<sup>14</sup> Nginde gwurnida je gwani yiiru giyee ngwuja'ri ngwe ngwanni ngwujaw ngwäri, ndi ari ngaa acajidi ndi näji gwudi Deleny dege dani Yicu Kirictu.

<sup>15</sup> Yäy gu no lani ngweengga, jar be 'di'däny ngaa mätinälü ngwuja'ri ngwanni ngweng-gacara je, manari ngweng-gacara je ngwündäjinä ngwulem ngwe ya ngweng-gacara je ngwuja'ri ngwe ngwüllinä.

<sup>16</sup> Nyii lotaca Delenyalu dege dani Yicu Kirictu ligo'ro le lüngün na Ngwaalu ngwuru Papa gwege gwani nga nga, ngwanni ngwämnä nje yimi'rü ye yüngün yanni yima aar nje ätäädä. Aar nje ätäädä or'temajing gwudi gwur'taling na ge'tajing gwanni gwujaw.

<sup>17</sup> Aar or'temaji yigor yalu ara je ojemeye nono ndi ärrü yi'ral 'dar yanni yijaw na ndi ondaji ngwuja'ri 'dar ngwanni ngwujaw.

### 3

#### *Otacar Ngwaalingalu*

<sup>1</sup> Gwodanalu lani ngweengga, otacar Ngwaalingalu gwani nyängä. Otacar jalu ndi ari a ngwuja'ri badalu ngwudi Deleny dani Yicu a je ngwüji näji nono näjinär gu 'danggalu.

<sup>2</sup> Otacar Ngwaalingalu ndi ari aar nje gu etadi ngwüji ngwanni ngwuki, ndi ari ngwüji 'dar ngwa'ti äti ämning Ngwaalu.

<sup>3</sup> A be Deleny diru ligor le'te pu a da je ojemeye nono da je gu etadi dijego'ro.

<sup>4</sup> Nyii lïcïnänü giyigoranu Gideleny ndi ari ngaa gilo lärrü yi'ral giyee na ya je gwuji ndi ärrü 'to yanni yenggacara je.

<sup>5</sup> A Deleny ruyi yigor yalu kay gidi ämnü gwudi Ngwaalu na gidi or'temaji gwudi Kirictu.

#### *Arnganar aa'ti ngaa la ru ngwami'ri*

<sup>6</sup> Ngwüriny ngwe ngwudi Deleny dani Yicu Kirictu, la je girinya lani ngweengga, 'tüdäränü gidiweengga dannu diru dami'ri da'ti indü ngwuja'ri ngwe ngwanni ngwenggacara je.

<sup>7</sup> Ndi ari nga nga yigo'ro ye yalu lilingidi yiru 'taa ndi ari ngaa gwuji gora gäri. Nyii lä'tüdi ngwami'ri gaji ganni gjar ge,

<sup>8</sup> nyii 'ti iyädi dijü gony gere ga'ti nyii gu ge'ta gony gere. Aar be ru manni ndi ari, nyii lundu ngwäy ndi ape yiiru dilu de nje ape lingen le nunnu aa'ti nyii la äbingini dijänü dere 'danggalu.

<sup>9</sup> Ya'ti nje ärrü giyee nunnu nyii la'ti ädi ndi nje ätä gu'ru, aar be ru nunnu a yigo'ro yäri ru gora galu nje gwüjini.

10 Ndi ari gwele anni jar, lätädä je dīmürä ndee ndi ari, “Gwere gwanni gwati 'ti apu yiiru, aa'ti gweny.”

11 Nyii lati 'dingini ndi ari loko gilo 'danggalanu liru ngwami'ri, lati 'ti abrralu ndi ape yiiru ati aar be jalu gangin gangin ndi äni giyi'ralanu yidi ngwüji ngwu'ter.

12 Ngwüriny ngwe ngwudi Deleny dani Yicu Kirictu, la je pácälü ndi ari ngwüji ngwanni ngwuru gu no, ngwunje girinya aar jalu mamma aar ape yiiru aar eny ngwuy ngwe ngwegen.

13 Na gwani nga nga, nggwa je ci lani ngweengga ndi ari, aa'ti ngaa la ayi nono ndi ärrī yi'ral yanni yidünälü.

14 Manari gwere nggwo gwu'donya ngwuja'ri ngwee ngwullu nje, ge'tar ngwäy nono aa'ti gwa le acajidi nunnu a yaaru ape.

15 Aa'ti gwaru güwän 'danggalu ngaa be girnya nono diweengga dalu.

### *Mi'rä*

16 Gweneno ara je Deleny didi adatalu ligo'ro lüngün ätädä adatingalu kaji 'dar na ngwaalu 'dar. Ara je gu Deleny ji 'dar.

17 Äny gwuru gwani Bulij gwullu aganning nggwee guy ge güny, gi'remna giru nggee giru 'ter ndi inggidi ndi ari äny gwuru gwullu je. Ulli gwüny gwuru gu no.

18 Ara je gu yimi'rü yidi Deleny dege dani Yicu Kirictu ji 'dar.

**Laro Bible (Bible)**  
**Laro NT**

copyright © 2020 Wycliffe Bible Translators, Inc.

Language: (Laro)

Contributor: ECS Diocese of Khartoum Translation Department

This text box needs to have content for PT9 to upload is to the DBL.  
All rights reserved.

2020-11-19

---

PDF generated using Haiola and XeLaTeX on 25 Aug 2024 from source  
files dated 29 Jan 2022

80c639f7-4569-5ffa-a77d-5df4c223631f